

Il elaboratur da metal a Mustér

Il directur dalla Distec SA ei eligius ella suprastonza da Swissmechanic

■ (anr/abc) La Distec SA ha meinsvart visetas cun gruppas che van tras ils baghetgs e las hallas da producziun. Venderdis vargau ha il directur Loris Marsura beneventau en casa ses collegas dalla bransch. Els commembers dalla secziun grischuna dall'uniun Swissmechanic ein s'entupai a Mustér alla radunonza generala. Els han eligiu Loris Marsura ella suprastonza cantunala. Paucs han priu notizia dallas visetas dil venderdis a Mustér. Per la vischnaunca da Mustér eis ei denton stau ina impurtonta viseta e president communal *Francestg Cajacob* ha era accentuau quei cun sia preschientscha alla radunonza generala. La secziun grischuna

dall'uniun svizra Swissmechanic ha salvau a Mustér sia dieta annuala. Dallas 31 fatschentas che fan part dalla secziun ei ina gronda part stada representada. Sco tiels impressaris, ils scrinaris e lennaris ed autras branschas ein era las firmas che elaboreschan metal unidas en ina uniun. Sil plaun federal senumna quella Swissmechanic e la secziun grischuna porta cunzun il center da scolaziun dils emprendists a Landquart.

Ina lescha che fa quitaus

Marcus Jacomet, il menader dalla partiziun dils emprendists dalla Distec, ed il directur dalla firma, *Loris Marsura*, han guidau ils rodund 25 participonts tras las

hallas da producziun. Pils biars eis ei stau l'emprema viseta en in menaschi che fa da principi il medem sco lur agen. El Grischun ed ella part sura songagliosa fan firmas sco per exempel la Bartholet a Flums, la Stag a Maiavilla, la Ems Chemie a Domat, la Freymatic Favugn, la Hamilton Panaduz, Polycontact Cuera ni Busch Werke Trimmi part dalla secziun. Loris Marsura ha presentau la Distec sco pli grond menaschi industrial dalla Surselva. Dapi 1989 fa quel part dalla RH-Group Holding da Bogn Ragaz.

El decuors dalla radunonza generala han ils commembers eligiu il directur dalla Distec sco niev commember dalla suprastonza. Loris Marsura ha era gest

priu la caschun per render attent ad in fatg che fa quitaus ad el. En connex cun transponer la lescha d'energia vesa el certs impediments per l'economia privata. Igl Uffeci cantunal d'energia pretenda che las firmas industrialas reduce schien lur consum d'energia sut ina certa procentuala. Quella pretensiun che sebase silla lescha federala ei cumbinada cun vastas expertisas e controllas, mo era investziuns. Sco quei che Loris Marsura ha declarau han las pretensiuns grondas consequenzas, tonpli che la Distec ha investau pér avon paucs onns e midau ora sistematicamein siu parc da maschinas.

Per dumignar igl obstachel che smatscha ei la Distec en contact cullas autoritads communalas. *Francestg Cajacob* ha confirmau quei senza saver prender posiziun en causa. Finamira eis ei d'anflar ina sliigiuziun. Sco quei ch'il directur dalla Distec ha declarau stuess la firma scursanir squadras e reorganisar cumplet il menaschi sch'igl uffeci d'energia insistess sillas pretensiuns. Las firmas da metal lavuran dil reminent cuntinudamein encunter la concorrenza ell'Asia ed ulteriuras cundiziuns engrevegieschan supplementarmein il squetsch dils prezis. Representants d'autras firmas da metal ein medemamein s'exprimi en causa. Sco els han detg ei il cantun Grischun igl imprend ch'entscheiva ad exequir quella lescha federala e la Distec para dad esser l'emprema ch'igl uffeci d'energia pren sut la marella. La restricziun vegn a far quitaus a numerus responsabels da fabricas e menaschis en Svizra.

La secziun grischuna dalla Swissmechanic el las hallas dalla Distec: Rodund 25 personas ein separticipadas alla radunonza generala. Loris Marsura (enamiez, davon) ei vegnius eligius ella suprastonza.

FOTO A. BEELI

